

四庫全書

集部

欽定四庫全書

集部

學易集

上諭

卷一 目錄

詳校官庶吉士臣吳烜

侍讀臣孫球覆勘

總校官進士

臣

朱鈐

校對官學正

臣

常循

謄錄監生

臣

薛翰

乾隆四十年十一月十六日奉

上諭據四庫全書館總裁將所輯永樂大典散篇進呈
朕詳加披閱內宋劉跂學易集十二卷擬請刊刻其
中有青詞一體乃道流祈禱之章非斯文正軌前因
題胡宿集見其有道院青詞教坊致語之類命刪去
刊行而抄本仍存其舊今劉跂所作則因已身服藥
交年瑣事用青詞致告尤為不經雖抄本不妨姑存
刊刻必不可也蓋青詞跡涉異端不特周程張朱諸

儒所不肯為即韓柳歐蘇諸大家亦正集所未見若
韓愈之送窮文柳宗元之乞巧文此乃擬托神靈游
戲翰墨不過借以喻言竝非實有其事偶一為之固
屬無害又如時文為舉業所習自前明以來通人擅
長者甚多然亦只可聽其另集專行不宜竝登文集
况青詞之尤乖典則者乎再所進書內有擬請抄錄
之王質雪山集內如論和戰守疏及上宋孝宗書諸
篇詞旨剴切頗當事理竟宜付之剗劂但其中亦有

青詞一種並當一律從刪所有此二書著交該總裁等重加釐定分別削存用昭評隲之允至現在纂輯四庫全書部帙計盈數萬所採詩文別集既多自不能必其通體完善或大端可取原不妨棄瑕錄瑜如宋穆脩集有曹操帳記語多稱頌謬於是非大義在所必刪而全集或可錄存亦不必因此以廢彼惟當於提要內闡明其故使去取之義昭然諸凡相類者均可照此辦理該總裁等務須詳慎決擇使羣言悉

歸雅正副朕鑑古斥邪之意

欽定四庫全書

集部三

學易集目錄

別集類二 宋

卷一

賦一首

五言古詩二十七首

卷二

五言古詩十九首

七言古詩十首

卷三

五言律詩四十五首

五言排律三首

七言律詩三十四首

卷四

五言絕句十八首

七言絕句六十三首

卷五

表十一首

露布二首

策問七首

啓六首

書七首

卷六

序十一首

記五首

碑一首

贊三首

題跋三首

銘四首

卷七

傳二首

誌銘六首

卷八

誌銘十首

行狀二首

誄一首

祭文六首

臣等謹案學易集八卷宋劉跂撰跂字斯立東
光人家於東平尚書右僕射摯之子也宋史附
見摯傳稱其能文章遭黨事為官拓落家居
避禍以壽終而不詳著其仕履惟晁說之景

迂生集有所作跋墓誌稱跋登元豐二年進士初選亳州教授元祐初除曹州州學教授以雄州防禦推官知江州彭澤縣其後改管城蘄水所至有政聲復主管成都府永寧觀政和末以朝奉郎卒所叙生平梗槩頗為詳悉說之又稱跋晚作學易堂鄉人稱為學易先生其集名蓋取諸此也紹聖初摯以黨籍貶新州卒於貶所建中靖國初跋伏闕籲寬

得復官昭雪世稱其孝呂本中東萊詩話稱
政初登科就亳州見劉攽所稱引皆所未知
於是始有意讀書厥後與孫復石介名相埒
蓋其行誼學問均不愧於古人所作古文類
簡勁有法度詩則多作黃庭堅體雖時露生
拗要自落落無凡語江西宗派圖中不列其
名殆以摯為朔黨門戶不同歟然淳熙中呂
祖謙奉詔修文鑑多取政作其辨寃時上執

政啟所云晚歲離騷魂竟招於異域平生精
爽夢猶託於故人者呂本中詩話及王銍四
六話亦均推其隸事之工即以文章而論亦
北宋末年卓然一作者矣其集原本二十卷
陳振孫書錄解題謂最初李相之得於跋甥
蔡瞻明紹興間洪邁傳於長樂官舍後施元
之刻板行世宣防宮賦學易堂記世尤傳誦
今元之舊刻久無傳本惟永樂大典內所載

跋詩文頗多雖未免有所脫佚而撮拾排次
尚可得十之六七共錄為十有二卷今恭承
聖訓于刊刻時削去青詞以歸雅正其同天節道
場疏管城縣修獄道場疏供給看經疏北山
塑像疏靈泉修告疏仁欽陞坐疏請崇寧長
老疏以及為其父母舅氏修齋諸疏皆跡涉
異端與青詞相類亦槩為刪除謹重加編次
勒為八卷併敬錄

諭旨并諸卷首用昭鑑古斥邪之訓垂萬世擇言之準焉乾隆四十六年四月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

學易集卷一

宋 劉跂 撰

賦

宣防宮賦

余以事抵白馬客道漢瓠子事感其語故賦

元封天子既乾封臨決河沈璧及馬慷慨悲歌河塞築
宣防之宮燕其羣臣乃稱曰隕林竹兮捷石菑宣防塞

兮萬福來顧盼意得詔問東方大夫樂乎朔進而跽曰
君王佩乾符安坤靈封岱岳禪云亭雷行焱馳一蹕四
海力餘氣盈爰覽德水至于人靡遺智天不愛祉石城
金墉屹立亭峙則又經廣輪度棟宇徘徊領畧心解目
覩八隅九維千門萬戶沈巖神麗泰帝之府于是植翠
華喧靈鼉觴川流浩長歌神哉沛君心和患去喜至無
所復加可謂樂矣然臣觀之未可謂無憂也天子愕眙
不怡少焉顧曰亦有說乎朔再拜曰主臣蓋聞大川之

源發乎崑崙之神墟出陽紆與陵門導積石而沈浮包
渾淪與俱遊羌疊疊其徂征千里一曲萬里九折盤礴
瀆滉呼欲洶瀆蕩然長波激為迅湍莽不知其幾何遂
異派而同瀾已而畧廣武循大伾轉沛輾洛積為委輸
漢沸出乎地上悅莫際其焉如粵若神禹繼道作德範
圍天儀聯絡地脉疏排浹漫鑄鑿峯峇平野其藝人有
安宅化鱗介為冠冕蓋千有八百國臣曾問道黎遵海
隅繇平成之徒駭下東光之胡蘇淵然覆黼脩若馬頰

如鬲及盤以簡以潔太史分流參匯衆折然後安翔徐
回脈脈並醜紆餘衍漾縣眇逶遲虬潛蛟伏波不得興
視榮光與休氣茂玉檢而金繩煥乎三日而五色何必
千歲而一清若夫羣雄逐兮位隔并山川圍兮氣弗宣
託洶湧以為貨兮阻屢屨以自藩崇墉連蜷蠹以相雜
兮巨浸澆灑汨乎宛延立遮害之亭謹白馬之津雉堞
瞰其東甌脫臨其西又東北留其行又西北擊其歸垂
天之翼橫海之鱗陲墮膠葛曾不得捨榆枋而泛蹄涔

芻豢勃鬱靡所容怒霆擊雷掣斂已脫兔益以桃花之
流駛乎竹箭之馭瀾滿瀕洞千里四顧乃始伐薪石程
畚黈汰鷄距之防橫鋸牙之木上下連環旁側伏闕竹
落千緡夾艘而下岌乎喘牛蹶若跼馬糗糧齊山徒庸
成林商羊鼓舞澤門謳吟析骸樵蘇慘于長平之禍累
塊珠玉埒乎水衡之藏諒人謀之或違將度數之適逢
今夫呼吸潮汐闕竅丘源洲潭浮空灘洹旁穿井乍甘
而撤舍麥未槁而培根何靈鼃之下伏寓三峯乎層巔

表秦紫之嶢峽陋靈光之歸然長封為扃土鍵石鐫守
如峭函萬葉不拔然而燕雀賀而人弔枝葉茂而本撥
財之力屈河且再塞君王方且駐屬車以流觀啟離宮
而落成卻四載之乘勞負薪之臣舉烽賦酒飛輪奉牲
戢長慮于一笑起駕望而憑陵神閒意定澹然無營語
未既天子數顧尚席推几欲興臣朔逡巡卻立不謝而
退其後館陶之役竟如東方大夫言

五言古詩

寄劉仲平

移居逼城阿頗似山中住當軒列佳石繞舍紛高樹園
林便為主魚鳥欣相聚春來物物好適意隨所遇是適
本無因亦復無定處當有忘機人知我此中趣

重寄

憶昨去國初置傳史所監季也行泣隨往舍都城南沐
我屢飯我終此一日淹明作分嶺水苦別心如悵遶歸
護孥重却掛東川帆停橈憩汭泗攬轡趨霍濶間闕又

相對共被栖窮簷未畢十日懽已復秣征驂猗嗟季行
役曷日弛負擔長懷芳草句未讀衣已沾先人門戶事
駕力詎克堪一朝奇禍發熾甚烈火炎頑迷得憂辱自
取非謗讒危巢風雨漂管蒯不足芟于時季來歸棄官
不待占收合敗散餘賴此守獨嚴闔門數百指一一恩
意涵輯睦乖迂情牢不見隙纖聚糧非短轂千里均屬
厭囊書動高聽思環賜東漸吾親所奇貴挺立故不凡
晚節就難冀前非掩多慚正如已璧人歎起蒙鍼砭衰

顏積霜雪幸亦解羈銜昨從憂迫來將復見安恬西廊
坐食菽可以慰飢饒漸欲親酒盞頗思疎藥奩願季愛
玉體恭我及西崦從今荷明時歡樂百無嫌酬恩無處
所香火供瞿聃

集句寄斯川

渺渺孤舟逝計日望舊居萬族各有託吾亦愛吾廬栖
栖失羣鳥暫與田園疎今日始復來再喜見友于緬然
睇崇丘負疴不獲俱試攜子姪輩且還讀我書親戚共

一處過此奚所須起晚眠常早誰謂形迹拘厚恩固難
忘慨然念黃虞養真衡茅下不樂復何如

寄馬全玉

歲月如歸鴻秋至歛將翔郊原帶爽氣榆柳媚無光客
子抱幽獨耿耿誰與明不辭青鞋賤來躡君子堂君子
松檜姿勁不慘風霜其交淡如水衆口未易嘗忘言默
領會此意卻難忘不飲知酒趣聊復酌公漿寒燈夜寥
闌一笑未渠央誰令別離此夢寐長相望

寄尹遷介叔

案後五首疊前五首韻當別有標題為傳寫者脫去連為十首

我生非良材頑礪不受礪讀書但漁獵初不名一藝形骸弱如柳暑雨更疲曳清風何時生一掃去酷吏

孫友太瘦生相遇一何濶途窮欲改操冉冉在故轍贈君七年艾輒為兒女奪養生有標本姑息良已末

我有好詩酒端為舅氏作陳遵見張竦雖見不改樂小官未朝謁日日事飲博書來託天真笑我守糟粕

二尹山東秀一第安足賀滕侯薦鶚書極口良未過青

衫五斗米所要脫飢餓自重士當然蓄積非為貸

前年郭法曹寓直經畧院同時幕府歸獨送兩秋燕新
書滿百帙鉛槧老不倦他時淮南子試為離騷傳

養志如養力益峻在益礪大方畧畦畛小智私才藝古
來要倔彊檻折不可曳何謂薛贛君小生敢相吏

擇術患不終未易笑迂濶發輒三尺輪不改萬里轍死
生漢節共巨猾氣為奪坐令李都尉慟哭天壤未

鴻夷笑井瓶同是意匠作拘方等歸盡放意差獨樂往

時二千石天子償。負博彼視淑德侯。何堪貯糟粕。

歌詞郢中來。未數白與賀。一斑昧全虎。端似隙中過。可憐光萬丈。不救妻子餓。平生嚴鄭公。阜隸有餘貨。

吏隱非山林。州府為道院。莫夸非食肉。虎頭領如燕。公田亦種秫。瞥去飛鳥倦。何用蕭德施。先生自為傳。

送陳述之

羸軀抱肺惡。喘甚劇犇豚。水飯輒短氣。矧敢近酒尊。君亦謝嵇阮。力醕不盈分。相看但蕭索。何以慰離羣。往昔

各少年束帶登橋門白眼霄漢際冥鴻注孤騫我髯今
蒼黃君髮亦翩翻同吏一州縣凍螢殭相溫頽顏歲月
去此事更誰怨願君愛玉體長使百憂緩非關易斗粟
政恐耕耘煩他時老相問一笑坐忘言

送徐彥榮

嬋娟水邊楊宛是渭川竹光翠相動搖照我尊酒綠松
風含衆籟雲月澹華燭何必簫與鼓清言媚幽獨當年
妙風致文采自膏沐會逢百煉明照此燕趙玉晨風惜

行色車騎喧出宿一笑如未忘新詩寓歸僕

送劉貢甫貶衡州

洞庭木葉下衡陽鴻雁飛放舟河之水歲暮以為期豈
曰無徑路大直固逶迤波平弭桂棹風清捲蘭旗紫蟹
間丹鯉霜蓴兼露葵醉歌辜杜若還以寄相思不厭道
里遠所嗟時序移會登崑崙丘遂索玄珠遺以茲鼓枻
去瞠若不可追乃知體道人涉世自有宜入獸不亂羣
安肯陋九夷如何錄錄者反笑抱關為

次黃完仲見寄韻

讀書老無味記一輒忘十視昔那得超但覺有不及誰
能求甚解拘窘被書繫為文亦爾爾造語須易給未足
解客嘲况復令鬼泣柴門一鵲噪童稚迎信入開緘故
人書快閱驚喜集新詩瑩病目儼若冰玉立才兼劉柳
健思鄙郊島澀定從西山來爽氣扶岌業惠然遠見屬
疑我故閑習叢臺三晉舊鎮靜無警急府寬郎幕尊森
衛走呼吸以茲書檄省頻歲息篇什神文庶暫對况不

閩川隕廬溪白士藪野處分屣笠如聞趣歸裝早作下
車揖吾廬雖庠陋雅亦便樵汲無酒或過雄有酒誰饋
伋何時甲乙第版築見君葺比隣或借倩梨棗亦得拾
不恥共秃翁相攜走城邑

次孫元中至後五日遊蔡氏園韻

林深宜夏炎亦復便冬冷居然安穩處合是招提境晴
煙起屋脊煦日下天井飽飯策杖出如行贊公嶺平生
一丘壑快眼春睡醒誰言城市喧能比郊原靜人間會

合少萬事等泡影適意不自取兀立真土梗時平日月
好歲熟羈旅幸逢人但懽喜得酒便酩酊知我非子誰
頻來不須請

費家風次韻二首

行年病肺熱當暑極燔炮宵分偶小息起步駐涼颺吐
此怪事發天北起喧囂扶搖駕霹靂萬竅爭怒號雙耳
不及掩對語何由交木作蔴葦拔瓦如埃埽顛頭呌怖
欲死一一驚兒曹所憂吾其魚遑賦屋上茅須臾事亦

定骨肉相勤勞東方漸杲杲音響為誰銷

風雷助神物茲理古不空邂逅一夕事知有費家風洛
橋誦書女涇川牧羊童不知費氏子業力與誰同便能
役蜚廉頗復鼓豐隆坐令城郭人在爾動用中劔出延
平水竹化葛陂翁况爾得人趣變現豈易窮時時要雨
澤祥暑殊未終勿逢金翅王非爾能長雄

子和惠貺佳什惇叙世契誦詠感慨情見乎辭因

次其韻

恭聞裕陵初文物萬古先仁英所造士臺閣徧招延堂
堂丹陽公發軔自賓筵維我先大夫整駕亦周旋一時
起接武千里稱比肩俱陳曲臺議共校天祿編心期久
相契燥濕無改絃晚登廊廟席玉筍照華顛殿馬並飛
蓋齋榻連脩椽到今啟事帖尺牘餘藤牋憶我既冠後
羣趨集英前公持柱史橐水鏡資平銓謂宜擢上第擊
節稱奏篇聲名竟寂寂感遇空拳拳事過劇脫兔邇來
三十年翰墨恍未落拱木森已圓嗟哉最孤露罪戾深

益纏迷途雖云指頑質何由鑄以茲衆惡歸白首猶迭
遭屢驚流夜郎敢望尉通泉絃腸恐齊斷身壁欲俱捐
豈知巢傾覆胎卵卻復全聖主日方中照曜無黨偏宸
筆下霄漢一洗空宿愆生還出望外喜極悲淚連詩書
手自束衣袂輕欲翔猶憂抱沈瘵針石久未蠲竭來問
醫藥蹭蹬淮之壩追惟曩時樂夢破無重眠疇知王公
子但說副車賔持帶走窮隸趣駕來飛旃勞我鬢霜雪
歡顏語媿娟北堂太夫人備福獨縣縣往者三殿朝吾

親亦班聯問訊逮妻女悲懼深愴然升堂一拜阻自痛
久拘掣念子事方殷使客舟車駢撥忙屢顧盼尊酒勸
留連新詩又來辱巨軸星斗懸七字健欲活靡靡爭春
妍夷途取騾驥武庫出戈鋌驟聞吳叔辯霍然病欲痊
感子重拜嘉儻未溝壑填西風理歸棹往稼汶陽田王
途正清廓天子仁如天軒冕豈不好于我亦青氈政惟
蕭丘火寒焰寧復然亨衢子當騁願言早著鞭高閣富
令息犢子亦所憐世交固未替更賴清白傳

秋夜次四姪韻五首

涼颼起天末，倏已掃庭戶。光鮮向時柳，慘淡非其故。鉛華不足恃，美人抱幽素。窮吾分當爾，不為讀書誤。

行樂北山路，繇力涉逶迤。諸郎騁逸足，掩冉去莫羈。歸坐獨兀兀，糜粥聊自資。狂瀾成止水，吾病真吾師。

顛氣日且肅，鳴絃此其時。泠泠太古音，慷慨不勝悲。翔颼媚百卉，苦雨何紛披。曲罷自澄寂，霜氣皎水姿。

千古柴桑翁，于酒頗能全。絕知閒居樂，雅乏從事賢。傾

心禱王母更欲丐長年
緬思東籬下想望故悠然

窮簷詎云陋霜月粲孤明
空山值飢虛秋菊餐落英
吾衰抱沈瘵玩物得我生
循分各有適天公一何平

學易集卷一

欽定四庫全書

學易集卷二

宋 劉跂 撰

五言古詩

宿靈泉寺二首

石磴排林端路轉陰嶺滑側身長風外凜落天為濶
冉冉光風浮金輪起天末

團團芳桂樹隱隱茁之幽敷坐翳其陰酌彼飛泉流綵

桐懷友人寫我心離憂

卷二

滑家橋逢壞舟者有感而作

橋傾若車翻舟破如瓦解二禍適相觸生此大狼狙齋
生海邊人試吏今得代鄉閭恍在望舟楫信所快頗知
大道夷不避小物礙撐夫虎豹健力出馳突外何其一
跌傷脫若葱與蒯疾雷不及聽生理歛焉壞瓦飛昆陽
戰鶴唳泚水敗身非呂梁叟沈沒豈不殆嬌兒年十五
八歲又其妹豈伊瞬息間生死不相賴死者長已矣生

者心破碎泣盡繼以血耳目生盲瞶哀哀天無情曠日
為昏憤徐觀水中意波浪自彭湃我來獨心惻涕出增
感慨頃年岳陽下憂患亦顛沛頽顏萬死中血肉偶俱
在今此溝澮狹豈復江湖大吐汝豈不仁曾獨與禍會
冥冥倘有主焚溺甚類醢不然遭無辜神理良汝紿從
今十手指永是後車戒靈均苦讒舌頽士厭沈瘵良時
不似昔努力善自愛我亦乘小艇兀兀信所屆搜求得
餘尊聊以勞疲憊雖微西江濶勿厭升斗隘歌闋從此

辭人生慎行邁

宴左山二首

閏冬節物晏十月猶素秋
招提陽岡路宛在峴山頭
史君有高致尊酒擅一丘
歡顏動長嘯松菊含春柔
風清宿霧斷地迴行潦收
時令將凜落飛光為誰留

行飯轉北岡如登贊公嶺
悠然竟晴日終比城市永
殘霞澹微照遙林耿疎影
天空氣象杳落落見此境
彼哉不自愛快意烹五鼎
來日苦大難忘言得深領

題東道輔懷疏亭二首

逢時樂宦達既達貴蚤休東門兩歸客冉冉不可留大
夫名賢後出處亦俱優築室在何許南郭林塘幽安車
搖佩魚步屨隨杖鳩勝日至佳客懽顏終獻酬鄙人最
樗散世用一何繆政以無事身尊俎常見收今年掃三
徑近不隔虎丘欲問杜陵老來往幾風流

賢哉疏太傅遺榮歸印綬當時漢廷臣未省出其右進
為豈不能止足吾所守驅車曉出關祖帳已曷狗惟餘

清風在竹帛端不朽大夫懷家聲相望千年後結廬離
城郭興致寄林藪華髮映童顏如公殆無有何必松與
喬豈弟神所壽嗟余真漫浪持是終安取敢言六百石
固已愧升斗行當自免去執謁隨隣叟縱復無新詩猶
期飲醇酒但問客如此亦許登亭否

秋夜自瀘溪泛舟入澤灤二首

浮舟入浩渺有楫任逶迤望迷烟樹合影迴星漢移清
靜水月界身到始應知

山橫染黛碧波散湧金明風微葭葦靜露寒魚鳥驚絕
境不得到愁隨歸棹生

舟行懷斯川用王介甫韻

遙往欲何之緩行聊爾爾悟身無期會在彼猶在此輕
舸類短鞍安取途九軌所嗟湍流長汨沒未及已蒹葭
鴈鷺澤清淺良可喜美人詐云遠耿耿隔一水憐我抱
沈痛藥劑厭餘滓談笑何時來幽憂賴湔洗

晁端州秀宴席

同寮貴公子好事敵原嘗晁侯更蕭散不愛囊中裝步
兵玉觥滑洞庭金丸香宛轉尊帶細紛綸繪縷長鰈魚
三百釘豈必河之魴吐嗟事便辦侍御色不忙熙熙春
臺上醉語各相忘湯餅最後出雖飽別有腸願君善遇
客懽樂殊未央不須投車轄敬舉主人觴

和梁十登三學閣

屏居倦煩促約此塵外遊于我快兩目云誰翻百憂蒼
山東北秀野水西南浮平生林壑心今老此一丘悲風

入叢薄掃迹瓜芋疇高樹未搖落鼎鼎彌道周感此節
物化澆忍何當休幻事涉苦海禪心得中州徙倚到無
言風鈴聲更幽新詩出肺腑明月非暗投終篇不及酒
似非我一流願為靈泉去醉語看橫秋

與諸人步郊外作寄舍弟斯川

行年踰六十衰墮百慮休新春逢佳日忽漫思出遊隣
曲四五人風味成一流步屨相後先散若水上鷗重城
未云遠乃得此林丘緬懷斜川人疎野更無儔千載今

日歡政爾聊相酬誰言恨枯槁茲語當信不阿連最領
此欲語翻離憂寄聲早歸來二仲須羊求

夢與舍弟登靈泉步趨如無疾既覺感而賦詩用

王介甫韻

老夫東歸喜豈復念西悲心安體當佳抱病如何其欲
成蹇士賦應作半人詩丘園窺不得溘死恐無時誰令
北山夢彊健變衰遲陟嶽石岌岌班荆草離離季也遮
我留更與道人期夢中差獨樂不類覺時為晝夕代乘

除勞逸更共之我豈不有瘳陰若相扶持福雖未盈皆
自怪盛如茨從今愛吾生糜粥養蕃滋

題古器物銘贈得甫兼簡諸友

往者李龍眠監河國城岸家多古時器羅列供客玩爵
觚屢飲我鼎鬲貯肴膳到今李侯書一展如對面邇來
三十載復向趙卿見收藏又何富摹寫粲黃卷沈酣夏
商周餘嗜到兩漢銘識文字祖曾玄成籀篆頗通蒼雅
學不畏魚魯眩遂將傳琬琰索我序且讚我衰心力薄

游不出里閤孔懷忘年友契濶異州縣深慚千里駕請
畢十日燕諸賢共留連更賴三語掾

見蘇黃邦字韻詩戲示王倅安國二首

時倅欲
往督捕

與君南北人斗粟聚此邦維彼惡少年潢池稱下江白
晝射大屋屋破無完牕繡衣募壯士受戢不受降我弱
異都盧豈敢學尋撞君才過烏獲九鼎一臂扛懸金八
十萬何啻白璧雙胡不騎赤兎斫樹收死龐坐寬刺史
憂不復念政厯凱旋夾道迎父老集瓶缸

天下本無事此語僅與邦得志不與物誓心有如江腐
儒若腐螢槁死讀書牕誰能守筆研心大云何降終然
氣相許霜鐘不須撞道雖千鈞重努力期自扛他時僑
與札日月聲名雙祗應南海趙便是襄陽龐慎毋彊揀
擇貴純不貴厖請見胸中物止水琉璃缸

答王允中聖推

長安重行樂寒食及佳辰聯翩出遊宴閭巷無居人動
靜各有趣拂我朱絲塵分將幽獨心守此蒹落身斯豈

衆所然獨子何殷勤叩門隨謁入俯仰色甚真從容一
笑粲不覺傾蓋新念昔各從宦宿毫為近鄰溢言相引
重嗟我曾未聞乃知國寶拙不悟王綏仁高談喜未定
佳句意益珍幾有按劍感驚怪惠好頻子方赴吏集朝
暮旅食貧不忍拜馬足會且掃朱門獨肯聞見我惟子
欲何云乃言人生世取舍理莫均譬之平地水東西南
北分感此重拜嘉幸子長相親

答王升之

去家今來歸川陸萬里長有官無祿食生理劇微茲飢
創何時瘳麥隴得扁倉丁稚八九人我老自裹糧不辭
終歲勤一飽幸見償所願杯椀足何取玉無當向來無
數青渾作可憐黃想見冰玉姿膏沐出沸湯誰作不祥
語詛咒甚砭傷妒人神所呵坐使天雨霧翁媪拜相賀
惟欲插翅翔新詩果來謝追悔如負芒君惟文字戲竿
木故逢場豈顧狷狹人為虐變炎涼且復置是事釀玉
滿君堂垂涎得涓滴渴夢轉顛狂不嫌餅餌惡雖賤敢

獨嘗交易儻許可寧復有他腸且毋火我屋亦未穴君
牆乘除各醉飽前事永相忘

七言古詩

作蜂室

栽基植甍作蜂室其陽分孔便出入懸窠毒螫非爾匹
百卉芳華登股膝孫息蟬聯深洞房露結膏凝如截肪
比功九粒冠百味削滓猶堪資夜光憐爾于人甚無負
一世分甘身獨苦高崖熏灼彌更難且復留連小環堵

寄晁以道

江東野老羹尊絲弗羹肉山酒為池啖我故人吏未歸
脚鞞手板方苦飢豈無盤飧置壁圭我乏是物君非宜
近聞示病作居士不似齊州稱主司歲惡無乃饒所為
自是不當食肉糜書來中有七字詩問訊勞苦開人眉
墨丸不減官隃麋著書寂寞來孔時我曹老矣善自持
莫擬狂瘦勝痴肥他鄉異縣久別離明月千里長相思

送高將永亨

大高毅身如伍尚弟有子胥天未喪小高自慕顏太師
能言兄守常山時事隨日往長已矣邂逅相逢識其弟
誰言恨不見古人兩意恐非令人比結髮行陣初齊名
志同不在同生死苦遭文吏巧見詆邊人至今猶墜淚
三年默默趨戎行驛騶捕鼠非所長趣裝定返雲中守
上書今遇尚書郎

次資道韻

今我不樂何所為調笑盡各言其好不願擊水南溟飛

但愛乘風北牕傲大夫
聲名過單父即日去受東朝誥
固知為偶我非齊莫忘相從君
與操駿辯瑰章殆希有
玉堂金馬應須到功成却記雞黍期
同著青鞋映黃帽

次韻大人正月十四日作

端闈夜許都人望紅繖亭亭坐
南向燭龍影落陸海中
廣樂聲在鈞天上華嚴寶藏光
景出雙鸞飛下蓬萊嶂
大平天子千萬歲呼舞共作高山唱
小臣躑躅百寮底
未許外班陪未行今來淪落一何極
山城裝點成窮相

苦吟漫欲酬節物擁膝句作酸寒狀搜抉渾如餌毒藥
畏縮更似藏私釀詩成竟亦勿交涉欲取樓蘭經樂浪
典衣聊復沽市酒一飲徑醉成昏忘黃昏陋巷燈火絕
守把不費城門將豈不見人生懽樂易生悲惟有靜默
長無量

隴上遇雨

隴上怕雨竟遇雨空山路窮避無所昆陽之戰飛屋瓦
白登之圍矢交下從者散去馬可憐故人借我非我馬

上坡歷塊已歌側下坡流滑攢四脚既償而起倏復顛
墮策夫轡心茫然從者好在無自苦履穿衣敝吾償汝
我亦短褐不得完掛樹一裂長尺五此生辛勤身不辭
七歲嬌女三歲兒泥塗模糊啼午飢買餅一百汝勿啼
溲沲麥飯蕪羹粥吐汝豈得長食肉仰天長嘆冠纓絕
下馬納屨踵亦決張儀舌在雖自知范叔衣寒一何切
人生貧賤烏足悲行吟不顧妻罵隨寄聲公等勿誚我
富貴莫忘牛衣時

答純益書懷

矯矯林間鶴，汎汎水際鷗。俱非鼎俎用，斗粟誰為留。君
師蔡義我，施讎同時聲。名今白頭博士，弟子動千數。逞
記軍中陳與劉，黃金絡馬錦臂鞬。印組文二鳴，八駟席
間設。戢竟何味，車上負芒終。可憂人生在世，各有趣。江
東且復客曹丘，田橫刎頸亦義事。感知捐軀非所羞，此
心會與君意合。今無古人何處求，不如置之酌美酒。同
郡諸公皆舊遊，耳熱眼花付一醉。雞蟲蚌鷸何時休。

重答

君文有如太史遷多至萬字少千言小詩未足見馳騁
要當著書名雋永詞源一深幾千文苦恨舉世無長綆
少時白眼視嚴徐老傍君門冉冉趨聲價若許金滿斗
倦游銷減一毫無雖貧終非兒女態倔强時時編虎須
食貧我亦懷抱惡泰山不毛秋濯濯糜乾黍空酒味薄
飢死不學東方朔

以鄙條贈晁掾

握手喜相逢何以贈契濶解我郿縣墨絲條繫君南海
穀皮褐結君歡愛君勿忘祝君玄髮如許長帶圍莫作
沈家令腰腹須稱東平王祇憂道人骨相發王塗駸駸
弦上筭金璽盤綬丙丁文魚須寶笏措錦紳此時此條
亦相尚參禪問道裴丞相

碾茶

玉川涕泣訟月蝕蟾蜍無光玳瑁魄委照墨海鸚鵡石
恐是雲龍小蒼壁我家得之天人家天下家金盤薦玉食

豈堪書生漱糠覈牀頭什襲封未拆不辭肩玉遺君飲
要君錦繡生肝膈意中佳句甚了了口不能道空脈脈
諸公椽筆好相過莫道彭城譏水厄

學易集卷二

欽定四庫全書

學易集卷三

宋 劉跂 撰

五言律詩

寄人

聞道江家宅
椒蘭春自榮
道人今好在
歸馬太遲生
飛鳥山南路
浮雲隴上城
相看各多病
搗藥待君烹

送成都漕

里巷居偏近生平月亦同
開懷一笑語轉首兩西東
共是塵勞內全輸吏隱中
魚來勤尺素淮汴古來通

送東之

受業師高第居官郡右曹
掾非蠻語得才有鸚書
襃會是人難及胡然力獨勞
府趨空冉冉誰得呂虔刀

送王升之

翩翩捧檄喜便作放舟行
愛客懷抱好能詩膚骨清
蹇余身濩落況此歲崢嶸
自是愁成醉離觴不復傾

諸公見過野飯晚步輔之有詩因次其韻

野人城下住巷底更誰鄰祇有攜筇路應無躍馬塵客
非俗士駕詩似古人淳載酒催公等藜羹難重陳

西溪次韻九首

終年倦城郭夢入水雲鄉酒美俱中聖詩成獨擅場高
風助悲壯皎月照清狂露下如鉛水沾衣笑淚浪
攜手西溪陌懽顏共舉觴雲山滿目靜風月一襟涼但
得杯中玉那知鬢後霜何妨擊尊破故作聽歌長

英英數君子貧甚亦清門蕭散俱相好疎慵每見原玄
談得涇渭芳意有蘭蓀從此窺名理金篦刮眼昏

漁人一竿老麤糲半饑虛豈有令鈞直惟應恨網疎有
時脚不襪自笑食無魚我自餘尊在愁眉爾暫舒

秋風漲川谷小汊亦容舠落照收長纜隨流試短篙隔
溪聞鼓柁臨海試觀濤解賦南州浦前身何水曹

洞庭明月下天地一冰壺悅對瑤池雪驚逢甍社珠窮
鄉悲百粵勝槩憶三吳誰作稽山伴秋風入鏡湖

輕雲巧迎月高柳媚踈光城堞傳嚴鼓尊疊動急觴望
迷山四面影占水中央清絕無人地居然五友鄉

幽人若幽鳥適意但早飛宦拙羞潘岳才多笑陸機不
堪尸馬革幸未泣牛衣來往瀘溪上鄰翁有釣磯

柯亭三弄笛慇懃粟易悲風妙曲來天上飛花落酒中翠
屏虛在望玉鏡迴當空摹寫何人解王維老畫工

次畢將叔韻寄壽陽三首

撫枕得滂湃開軒延翠微乃翁故時客何許更言歸有

金
卷三
興添書滴無心傍釣磯惟應一大事策杖到禪扉
苦竹湓江宅黃山秋浦亭猿聲作頭白客淚對衫青笑
爾悲鳧脰知吾寄水萍時時賴嚴尹小隊出郊坰
丈人文力健能事與心違彭澤稅田少襄陽菰菜肥紫
團生雪液蒼餅破雲衣持許無人寄慙慙小陟歸

題張氏園亭二首

蒼頭奉筇竹稚子試春衫共著野人服來遊居士巖園
蔬佐酒椀藥錄貯書函草草非難得從今不計凡

岸薺隨漁屨林桃映舞衫定非銅雀榭似是雨花巖
儻
有家千指書多日百函斯人太高語吾意祇塵凡

與李深梁山泊分韻得輕風生浪遲五首

大澤水常滿秋來洲渚平游鱗不能渡短棹若為行
氣
吐西江蜃風搏北海鵬波濤未可料汨沒恐身輕

從今魚易得居與水相通世事青天外生涯高浪中
蒲
深疑落日萍轉覺回風勸爾終身計鷓夷是范公

為問風多逆舟行太緩生漁歌不用調水宿莫論程飽

有雕胡飯香無錦帶羹相看乏酒飲愁劇似淵明
莊生語逍遙元子稱漫浪此身如土梗雕刻不成樣何
心解賓戲猶欲避官謗默默難具論幽愁浩盈望
丹鳳不出世整翮上林枝黃鵠非所擬翔集偶為期風
高不易到歲晏仍苦飢扶持幸有托敢厭路遠遲

舟中二首

野水今年長青田入白湖鄉音聞驛馬風力驗檣烏永
夜眠雖著高秋病未蘇常憂北山拜辛苦倩人扶

故國風烟外飄零隔歲淹
今茲去拘窘行復見安恬
未擬親酒盞何當踈藥奩
酬恩無處所香火供瞿聃

使遼作十四首

自昔和戎便于今出使先邊烽
宵不見漢節歲相望
州邑三餐遍溝封一葦航
太平無險固道德是金湯

虎北奚南迴居然帶礪全
百尋天上樹千里掌中川
毳幕宜逃漢山戎莫病燕
即今甌脫地渾占兩河田

禮為王人重關亭道路除
荒城初部落名鎮古巫閭
習

俗便乘馬生男薄負鋤傳聞斷腕地歲歲作樓居
但逐銀牌使何堪記驛程路迷如欲盡山轉忽通行列
仗東丹騎先驅渤海兵鑿空誰計此曾未及長纓

寒日川原暗顛風草木昏捉襟愁肘見語客畏聲吞曠
蕩疑人少倉皇覺馬奔勿驚銷髀肉長遣節旄存

神水堅冰合沙場寸草無長疑淚是血誤喜唾成珠晝
出驚貂鼠宵鳴厭訓狐悲歌人不應自覺寸心孤

北嶺能捫斗南岡欲摘星舊聞空耳滿異域得身經好

築嫖姚塚仍刊車騎銘莫言天作限關路有松亭

鼓角霜初曉簫笳日欲曛莫為天外意只作夢中聞問
道無人迹嘶風有馬羣山高飛鳥急決皆入層雲

一作重山去頻看破鏡飛長悲青塚怨莫忘白登圍禮
覺周旋異心知笑語非南飛何處鳥安得與俱歸

喜鬪人皆勇誅求俗故貪為謀不耐暑嗜味獨便鹽已
怪今生到寧能一夕淹長安遠如日北斗望為南

今日朝元仗千官兩掖門從容魚藻晏供奉栢梁尊厭

服貂裘敞愁看桂酒溫誰知廣文淀水面箔為藩

置酒穹廬曉僧山合管絃應緣地褊小難遣舞回旋風
急皮毛重霜清漣酪羶君看東嚮坐貴重盡童顛

王春今日是北歷自相忘厭食乾羊味如聞生菜香隴

梅渾破臘燕鴈正隨陽時節催歸興憑陵天際翔

北歷
立春

日
差一

日覺筋骸耗中宵慘未寧厭看山濯濯快見栢青青記
里無官堠依身有短亭心驚此何地生死一流萍

病中

病如漳浦臥一腹果然浮不著三升飯能容萬斛愁水
聲回別浦山影到中流遣興須憑酒慙慙為汝留

曹紘陷交阯十七年與其母逃歸得官汶上求詩
曹侯將家子異域久飄飄人獨憂羝乳天方借海橋亡
弓終在楚去鶴會歸遼凜凜今如許風霜看後凋

答景亮二首

門無車馬迹臥榻兩閒人野服風前薄園蔬雨後新絲

桐叔夜操香火淨名真斜日穿簷入悠悠對隙塵
吾廬亦自愛況屬仲春中賓榻疎簾隔鄰園小徑通何
妨書裘亂未遽酒尊空更約高人過當軒看偃松

七夕

夜永風露下庭空簾幕秋盃盤延素魄針縷動雙眸天
上祇今夕人間寧少留如何一水際歲歲此相求

五言排律

寄贈

絕世丹青業中臺雨露辰師門推上第王室見名臣磊
落儒林文風流畫省賓燕朝分錦仗倬值近楓宸鳴鳳
丹山穴占星潁水濱殿廬俄厭直藩社此班春山節還
銅虎京符換玉麟威行三輔地歌浹兩川民已喜徵黃
霸無勞借寇恂即應公簡上會見俗還淳歎昔時難偶
逢今勢莫均楚材難入晉漢法近沿秦稽古皆前列希
風絕後塵斯文如汨沒吾道久湮淪海嶽功歸聖熊羆
釣有人藍田仍產玉郢匠早揮斤周歷方開永蕭規欲

盡循天時知會遇人力漫紛綸夙有摻絃便今逢斂板
親猥慙牛下走敢玷席中珍迹遠龍門峻心懷燕厦仁
緒言聞已舊從此更書紳

答資道

都尉聲名後篇章不乏才談高正始際詩自建安來險
怪探龍頷甘珍味豹胎陰何長有思郊島漫相猜白雪
憑誰聽黃花入衆吟楚醴寒水薜蜀興動官梅晚艇翩
翩鳥秋濤隱隱雷水兼天浩蕩山為日崔嵬麗藻煩三

復愁腸殆九回自慙無世用莊語笑迂駘

七夕戲效西崑體

終年情脈脈此夕夜遲遲玉宇秋來闋珠簾夜後宜
仙娥月為姊海實樹生兒露共雲車下風將鵲扇移
鮫盤空有淚椽筆未成詩借取揮戈便金釭更百枝

七言律詩

寄葉勤次其韻

五斗折腰俱為貧詩書律令若為分西山今朝有爽氣

北闕無時飛白雲一紙綢繆三歲字七言慄慄九章文
故人好在長相憶悵望江臯麋鹿羣

送趙侯思恭

西城冠蓋日初曛南浦笙歌夜嚮晨何許煙波千頃隔
爾來霜月一鉤新名花只許平泉有開讌誰如北海頻
我亦尊前舊時客獨將衰白臥漳濱

用公允韻送介叔東歸

曾曳長裾何處門楚聲悲壯不堪聞侵陵急景東都雪

觸忤新愁南浦雲未信書生歌獄獄要令天子禪云云
少年持許今安在拭目翱翔鴛鷺羣

次王彥昭寄蘇景謨青社園亭韻二首

丞掾分曹付舊規翩翩文彩妙當時何人誤讀雌霓賦
他日真成幼婦碑曲水流觴如故事平山行樂有新詩
春來想見棠陰盛可但詩人別後思

誰道前賢迹已塵園林氣象邇來新高山流水有深意
翠竹黃花如故人小隊郊坰時訪客後堂歌吹獨留賓

汶陽寂寞無佳賞臥閣蕭然過一春

涵輝閣次韻

光風冉冉動平湖花草幽香滿坐隅薰暖頗如懽伯在
蕭閒宜與此君俱可無剡水乘舟興端是郊居作賦圖
借與禪翁有幽事一支筇竹倚圓蒲

行次長風沙次韻

清晨喜氣動江流兩見新篇到小舟石裂崖頽非快意
風聲鶴唳亦消憂已令雙鯉隨梅使更不飛鳥倚柁樓

興味從今得嘉境著書應不號窮愁

遊白雲山次韻二首

不到山中寧久如兩日闕然或闊疎每憐身留只意往
何事子行令我居莫向山僧疑入定但從溪友試觀漁
朝來新作幾兩屐更待西原春雨餘

數子讀書渾欲狂深山縱汝共徜徉千鈞腳力有底健
萬丈心情如許長對景吟哦亦有意逢人笑傲若無旁
幽花細草何足賞歲歲天邊仙桂芳

次孫君汝弼晚步韻

寂寥誰過仲宣樓，邂逅斯人肯小留。
多病兒童便食粥，忘機鷗鳥共臨流。
賦成擬學張平子，志大空慙馬少游。
載酒從今相煖熱，著書應不號窮愁。

張大年覽文與可墨竹及先人所題與可挽詩見
惠長句因次其韻

墨妙蒼筤雙玉枝，賞音悲壯七哀詩。
多慙寂寞青氈地，又得風流黃絹詞。
往事白楊無數拱，餘生衰鬢不堪垂。

聲沈影絕何人識
賴有柯亭可見思

次介叔韻

酒船定向江東去
知有風流賀季真
北嶺南岡元自熟
短楊高柳邇來新
老吾官職渾無味
壯子文章最有神
知欲絃歌且三徑
徵君莫自傍風塵

次胡伸道韻并簡公允弟

幾年書不到江東
知我忘形事事慵
南阮最貧方遠宦
阿連同調且相從
狂生肯信原非病
妄校須慙廣未封

安得論文如定力不眠長聽五更鐘

次大人二月三日過吳德仁韻二首

溪上高人稱福吳一尊深喜共為娛
步行可是困公子日晏不應驕
灌夫縱履全勝驅下澤
緩歌長欲聽提壺
行年八十心如水平
正覺公非嵇阮徒

一一郊原春事催
客愁今日為君開
柳枝鸚鵡未成舞
溪面葡萄初潑醅
曲水便應詩句滿
稽山那復酒船迴
海棠徑裏紋楸石
為爾從今得得來

次賓子野韻

不辭身熱野田風水引膏環入眼中麴米顧公多樂事
鉏犁憐我有深功博聞可但百間屋愛客未嫌三斗葱
天麥毒人安敢獻莫令堂上一尊空

次黃完仲韻

幾年流落喜東歸笑語相懽此一時
輾輾小車真快意伶俜短杖且扶危
新詩遣興幾成癖濁酒忘懷定不癡
政恐為官拋我去除書聞已下京師

題僧道誠應緣菴用李端叔韻

歷歷孤寒不可羣
應緣聊寄夢中身
無絃琴裏本來曲
枯木巖前元自春
詩句已多猶恐少
禪機雖舊不妨新
鄉山更好莫歸去
且伴蒲團夜坐人

惠山寺

從來未到山頭寺
應在武陵深處藏
漢水丈人生自拙
香山居士興何長
四旁島嶼娟娟綠
萬頃菰蒲靡靡香
且醉尊中眼前物
瀛洲蓬島兩微茫

龍山寺

曉色翩翩烏帽輕道人瞥去不關情
高山流水為誰說翠竹黃花空自生
急雨欲來先暑氣涼風已過卻秋聲
後期好取歸時月照我深崑處處行

又泛西溪

春晚西溪入勝遊白楊花亂綠波浮
欲延笑語遲行酒要盡溪山緩放舟
灘上時看魚撥刺林間靜聽鳥鉤輶
年來偷活干戈際強把閒吟寫我憂

題半隱堂

一堂圖籍自陶冶三逕蕭蘭俱歲華定非平恩許侯宅
會是仲長公理家端居雅不煩拊擋佳設頗嘗成咄嗟
惟我身閒數來徃徽絃一泛即生涯

和長歷賦紙閣用王介甫韻

頂還平直得中方肯作僧庵半夜牀脫帽不憂風栗烈
熾爐仍助日蒼涼賞音正自鳴琴便宴坐何辭問疾妨
我有陟釐三百幅禦冬真欲倒歸囊

和石友

卜居無賴款郊扉忽忽春還樂事微莫道身貧非是病
由來人瘦不知肥謹呼豈肯觴三爵落魄誰如帶十圍
富貴功名更誰是且來同醉莫相違

和曾存之約遊北園

主家韋曲小桃溪客有詩名杜拾遺煮酒未成逃暑飲
夾衣猶及惜花時樾間日下潭潭蓋蘋末風生寸寸漪
一醉百篇供草聖主人拚取墨為池

和王景亮席上

兒曹付汝莫相關來伴詩翁作醉顏
花似有情憐客老竹應無意惜春還
已憑玉麈消爐篆不怕金輪照屋山
尊俎重開定何日北溪流水正回環

東南秀羅亦佳山而近用前韻約遊

邂逅飛蓬身事輕異鄉風物不勝情
出無輿馬自憐許食有鱸魚空瘦生
失路漫漫迷日影並溪漚漚灌田聲
似聞更有佳山在試卜東南十里行

答尹彌爾

門巷相看經幾時
重來新事如奕碁
從今碌碌自我拙
爾後錚錚非子誰
每驚咳唾盡珠玉
定有錦繡生肝脾
人生蓋棺事乃已
一笑一頓安足悲

答劉槩石豫

春來深覺境翛然
幽鳥簷頭接翅眠
落寞久知身是夢
安閒更喜日如年
江山南國樓臺外
桃李東風錦繡邊
野興暫成沂水浴
故人盍駕越溪船

贈秦帥吳子中

河嶽根源稟植堅，金行鼎鼎應弧懸。
執珪阿閣三階上，建隼元戎十乘前。
都護已高延壽最，中朝深記弱翁賢。
從今看似張丞相，富貴康強一百年。

重葺前堂榜曰學易景亮六丈寵惠新詩謹賦二
詩上謝

並舍荒蕪三四尋，稍營軒檻便幽深。
已將種木待休影，未暇攤書聊洗心。
投老篇章愁脈脈，隨緣香火靜悃悃。

從今掃灑供雞黍知有高人肯見臨

草堂門徑邇來通好事何人肯過雄故與圖書為伴侶
可無風月到簾櫳生平適意絲桐內老去忘懷麴米中
感激新詩百金重貧裝從此不憂空

舍弟寄茶

吾弟餉人真不惡建芽來自禁煙前一杯未易陽侯厄
四兩應為蒙頂仙病子頭風如得藥酒家中聖殆忘眠
平頭奴子堪餅椀可帶樵青竹葉煎

遣懷

此身為客幾東西萬物須于一馬齊
山色不隨春草綠邊聲長伴夜烏啼
宦遊碌碌憑誰記簿領紛紛為底迷
猶喜官輕無局事不妨酣寢過晨雞



學易集卷三

欽定四庫全書

集部
學易集卷四
五

詳校官庶吉士臣吳烜

侍讀臣孫球覆勘

總校官編修臣王燕緒

校對官學正臣常循

謄錄監生臣薛翰

欽定四庫全書

學易集卷四

五言絕句

坐進庵戲作

自吾營此庵遷徙屢有無壁間故人文今獨與我俱
結以不根茅蓋之無鑰鎖堅密烏有身非坐常宴坐
圓蒲與方竹伴我守幽閒夜闌得禪趣明月窺窓間

宋 劉跂 撰

王升之絕句以詩成有共賦酒熟無孤斟為韻因

次其韻

端居得韻語不作涼秋悲快若彈丸轉知是王家詩
之人嫻辭令病起猶越聲不量蒼蒼鬢屬和愁僅成
客來問玄解付與尊中友我口不能言此間甚多有
欲逃蘇晉禪苦乏陽城俸鄰家稱子貧杯酌與君共
憶昨艘檝間月白雲水暮妙語同賞心請君來重賦
且無遽典衣素書堪下酒旋斲金鈴黃栽軒媚重九

念當歲崢嶸少別友中玉夢寐大刀頭安得盧橘熟
霜蟹豐兩螯磊落登盤盃疊疊倦咀嚼繫我愁獨無
庭堦脫葉靜岌岌高井梧鴈聲排雲去歷歷心不孤
夜寒慘不寐起坐彈鳴琴之人邈雲漢空盃難獨斟

梅徑

幸蒙託根地歷歷令著行莫遣桃李妖壓我玉雪香

葵軒

朝暎媚花木戶牖延榮光新沐晞我髮悠然成坐忘

竹里亭

雖無白家池竹是九之一新萌如許長來歲障夏日

藜杖

雨衣類襜褕野屨號不借扶此枯藜根行田北山下

學易堂作

幽居淡無營飽食心晏如老不任作務讀我少時書

七言絕句

和張赴供備

騎曲休歌出塞愁渥洼名馬鸛鷗裘文章不暇三冬足
骨相由來萬戶侯

桓桓壯氣敵陽秋冒雪衝風不被裘天子方修上林苑
戎王莫怕義陽侯

和初到嶺二絕

到後渾如痛定時不辭追賦道中詩趁虛糴米非閒事
莫倚文章堪療飢

欲語吞聲且復休異鄉風物伴牢愁鉛華不為無人識

獨自妝成卻自羞

玉簪花和希純

有香無色不因春
端是書生席上珍
同作齏鹽賦詩客
定非歌舞賞花人

根移少日便花開
數子殷懃手自培
更翦素衣成鶴氅
玉恭定向雪中來

玉蘂花開動玉宸
唐昌觀裏夜逢真
仙人瓊卉初無比
直恐芳心卻未申

鳳尾成陰蕉葉重金鈿相對菊花繁莫悲舉世無相識
佩蕙紉蘭有屈原

孤潔偏因霜露成春花無數不知名祇應新沐彈冠客
要爾相宜一倍清

日日花前醉賦詩多情休誦北山移沾巾不要時人學
獨為秋香插一枝

姑射山前舊約非秋風滿意未成歸仙人一去無留迹
墮珥遺簪作雪飛

藍田故有他山錯瑤旆瓊旒碧玉千左紫姚黃滿金谷
野人留取伴雞冠

贈王安國芍藥

羣花銷盡獨芳菲
淡沐輕膏知為誰
寂寞書生久無意
風流別駕合相知

相州園

解鞍休馬暫蕭然
雖晚猶堪一醉眠
所到園林且為主
若須吾有是何年

又泛西溪詩十首

溪小纔容舴艋舟一樽聊復寄春流
縱橫不用施篙棹自在教隨水上鷗

溪頭青草弄春柔一帶花開動客愁
貪看波中錦紋石不知船已過芳洲

春水微生放鷓初和風習習日舒舒
洲前且為停輕楫待摘萋蒿煮白魚

扁舟如箭過前灣飛鷺多情送我還
張起片帆風正急

回頭已失蔡公山

天生橋畔水交流
夾岸花飛逐客舟
時聽山禽歌一曲
何須吹笛舞涼州

下瀨忽驚花滿樹
踏舟常恐酒杯翻
鼻頭只怪香風遠
知是行過桃李村

寒沙如雪水如藍
歌嘯中流響半啣
祇恐驪龍驚睡覺
呼風吹浪濺春衫

春樹連山水浸雲
擢歌初奏浪花分
溪神為我添風色

十里歸來日未曛

淡淡春煙夕照微
渡頭已覺行人稀
玉樽未盡賓朋意
兩槳何妨待月歸

岸邊漸長陶潛菊
渚畔初生柳惲蘋
自學操舟狎清泚
從今休笑徃來頻

次黃富道覓山釀韻

深巖窮谷自涓涓
慙愧詩情卻泫然
政使家貧無麩米
猶堪烹作惠山泉

寄張竦

張侯生意祇如瓶
出入艱難亦自成
卻縱鴟夷差獨樂
此中何物不堪盛

和定國湖上

溪光涵影碧蕭蕭
四合深林不見梢
寒暑若言無避處
世間那有沉雲巢

雨過松篁多樣翠
風迴蘋藻一般香
玉蘭桃李非無意
興味由來靜處長

菰蒲深處水藏波邂逅相忘自嘯歌
曳組懸龜知底用水邊消得一漁蓑

酤酒添庖趁晚飢冷淘堆椀照銀絲
羹芹有意無由獻此味君王恐未知

鷓鴣鷓鴣樂更真夷猶溪水碧粼粼
全如傲世佳公子泛泛波間不可親

盤中擘粒試垂綸與子應非臧丈人
渭水何須笑溫水絕勝憔悴楚江濱

夜坐示兒姪

露下天高秋氣清
北書不到鴈無情
且將欵曲終今夕
遮莫鄰雞下五更

尊香輕泛數枝菊
豈獨春風一一回
自憐寒律窮途客
不恨飄零卻恨開

戲示語道

御史青驄持望重
將軍赤兔得勲多
乘黃驪裏今相見
垓下烏騅奈若何

麥壘

麥壘漫漫宿藁黃
新苗寸寸未經霜
手中馬箠餘三尺
想見歸時如許長

次韻智夫并呈庭誨

為問尊前醉阿誰
韓娥應轉縷金衣
何須料理沙邊客
更遣梁塵作雪飛

臥隨編草依龜背
行踏冰泥上馬垠
卻望高城在天上
故知李郭是仙人

答景亮

十札新詩忽見投，筆端高興不能休。
願將筋力如公比，安得耽書到白頭。

以茶寄安國

苦茗槍旗誠鄙甚，密雲龍鳳太高生。
一甌為寄忘年友，此味應須識此情。

闕題

君家十畝春蒼筤，犀株解籜冰玉香。
山東麥飯藜羹客。

有底詩情合得嘗

先寄左軍語道

已喜仲容連騎去更思小陸度山來賦槐白士愁顏甚
喚取溪傍一笑開

咏呂步舒詩

先生卯翼計平生針芥相睽禍欲成自是揮斤非妙手
郢人為質卻無情

緡書見舍弟去年自壽歸鄆道中詩悵然懷想久

不作詩因集句為答用渭城體可歌也

春深逐客一浮萍何處淹留白髮生
山城過雨百花盡
野渡無人舟自橫

青春白日坐消難須著人間比夢間
八公山下清淮水
明月何時照我還

汶陽歸客淚沾巾莫厭傷多酒入脣
暫時相見還相送
水遠山長愁殺人

荒山野水照斜暉綠淨春深好染衣
請君問取東流水

來歲如今歸未歸

尋思百計不如閒塞馬重來事偶然
皇恩若許歸田去
頭白昏昏只醉眠

詩成吟咏轉淒涼
獨宿空簾歸夢長
長年事事皆拋盡
惟到尊前是故鄉

重送成都漕

曾遊淮上愛清流
況子宮為郡督郵
可賀呂虔賢太守
佩刀應得不須求

口號

孟仲爭秋毒熱新自今三指算歸旬已判明月隔千里
可對茱萸少一人

面目已憑詩寄去笑談須待自將來香泉不煮雙金榼
候取歸人趁菊開

闕題

北堂手種藍田玉采斲不隨薑芋疇邇來留得花為佩
付與吳儂可療愁

又景亮惠藜杖賦絕句以謝

藜根矯矯似枯松扶我蹒跚病力窮
置几賜餐非所重
康寧願學樂全翁

銀角桃枝空有賦鐵根藜杖可無詩
從今客到迎門待
還我維摩未病時

張辟疆

老畫駸駸不可攀風流依約片言還
小兒若悟他年事
肯使生心涕淚間

覓竹示子勉

為覓新篁雪後移
殷懃都莫遣根知
道人要作騎龍杖
與子相從到葛陂

和公度

多情佳客送春來
雉尾貓頭次第栽
從此庭前共蒼翠
天桃繁杏不須開

松石

長茂用武子流沙作松石
既成示予而武子來

請作小詩歸之并簡長茂

筆端陶冶不無神
紙面流沙秋後雲
點破沙痕便成水
一溪松石浪沄沄

向來愛鼎已成癖
今日還書真是癡
不分多求董威輦
只應重老李咸熙

恩赦放還集句先寄鄉中弟姪二首

去年當日別東都
魚鳥猶疑畏簡書
詔恩許逐陽和至
只向長沙住歲餘

欒聲衝雨似鳴機終日思歸此日歸自為野客尋幽慣
不用登臨歎落暉

閒思往事似前身羞見黃花無數新我家孤姪在海浦
遍插茱萸少一人

學易集卷四

欽定四庫全書

學易集卷五

宋 劉跂 撰

表

賀郊祀禮成表

肇稱禋祀對越昊穹慶熙事之告成綿庶邦而均惠邇
音下逮輿頌交欣臣聞祭不欲䟽莫如仲冬三歲之制
神何由降厥有黃鍾六變之音恭惟皇帝陛下至誠感

神明德恤祀緝熙累聖之典茂對一陽之正彰明察而合柔祇報本始以侑烈祖帝歆儲祉孝饗流光三階以平知神靈之響答一人有慶宜惠澤之風行臣夙奉明恩茲臨近服駭奔無路竊抃于懷

賀太皇太后表

天郊訖饗帝室受釐修賀慶之禮于宮中沛赦宥之恩于天下書文所被蹈舞載懽臣聞詩歌肇禋以熙文王之典漢徙秦時必就長安之郊洪惟盛時克有成憲恭

惟太皇太后陛下躬任姒之聖御成康之朝心勞七年
體正萬事海內充實足以制禮而備多儀天子聖明宜
其執玉以見上帝乃稽列聖之制肇舉園壇之文禮行
一時懽動四表臣親逢盛際服在近藩雖莫預于駿奔
實退深于慶頌

賀郊祀禮成表

升泰壇之燎始竣事于國陽下丹闕之書遂覃禧于海
寓臣聞人本乎祖莫如配天之崇禮行于郊是為饗帝

之威恭惟皇帝陛下丕顯前烈翼宣重光自迪典謨之
言克勤牲幣之事四時歷款于原廟五歲再見于合宮
神靈居歆聖敬益廣乃延長日之吉肇舉圜丘之儀頌
思文之功以追侑我烈祖隆大報之義茲徧走于羣神
至音繹如精意孚盡物以德享神祇祖考既安樂之恩
如春行鰥寡孤獨無凍餒者書文所暨蹈舞載懼臣越
在外藩欽聞盛際古有分土雖莫預于駿奔邦之榮懷
退不勝其竊抃

賀太皇太后表

園丘祀帝大報而徧羣神宣室受釐推恩以及四海臣
聞漢家秦時因天子所都而為居周制肇禋率海內之
職以助祭若古熙事屬我盛朝恭惟太皇太后陛下保
佑一人纘承六聖賞罰刑政之不悖寒燠雨暘之孔時
七年于茲百度咸若以此致享固氣臭未達而誠通宜
其居歆若影響相隨而福至踵祖宗三歲之後叶天地
一陽之休靈光燭臨民氣和樂亶東朝之共治偉元祐

之初郊載祀之常今日其始臣夙叨眷遇茲備藩方職
畏簡書莫綴甘泉之仗身先民吏共揚嵩極之聲

賀冊皇后表

以世主之尊而二姓之齊好當陽亨之會而六禮之備
行慶肇始于宮闈福遂流于海宇臣聞周有建國立制
之利以觀陰禮之修漢稱繼體守文之君亦資外戚之
助恭惟太皇太后陛下奉承先烈保佑聖圖聿增治具
之修永言宗事之重順迪經義備舉國章退深抑其私

親外博謀于庶姓曰咨種德之裔乃叶倪天之祥龜筮告期已嚴于茂冊禕褕受服將事于大宮三靈交和九廟增重臣久參近列方守外藩

案此下有闕文

賀冊皇后表

備行嘉禮內統正于宮闈肇建長秋外始基于風教書文所暨蹈舞載懽臣聞禮之本在昏以承先祖之重帝之嫡稱后斯正小君之儀人之大倫古有成憲恭惟皇帝陛下道主簡易治隆本原勸學而民心親正家而天

下定將執裸獻之禮于七廟且視膳羞之養于兩宮雖
詩書所稱本乎內治然唐虞之際不其才難所得塗山
之賢以充椒房之重臣欽聞熙事越在侯藩身滯周南
雖莫綴甘泉之仗化行江漢行見誦闕睢之詩

賀同天節表

正陽主夏物迎假大之期浹日為旬數備萬盈之義天
佑帝歷時生聖人慶邦國之休祥極海隅之歌頌恭惟
皇帝陛下功貫天地聖侔祖宗朝廷宿道而向方蠻貊

請命而下吏作新憲度招籲俊良置天下于山嶽之安
結人心于膠漆之固周家卜歷過七百載之期漢殿稱
觴上千萬歲之壽

謝先公復官表

沒齒蒙辜稍從昭復闔門瀕死更許生還聞命震驚感
恩哀慟伏念先臣某孤立一節歷仕四朝先帝擢升本
由神考之遇元祐論列實踐熙寧之言繼諸老以立朝
先衆人而去位黨議大起削籍無餘誣構橫加益棺未

已賴先帝徐察無根之語迫陛下大布惟新之恩雖極孤危亦蒙貸宥重念臣嶺表數歲門中十喪舉室遷離先臣客殯于他所司逼迫老母病終于半途骨肉無以相收道路為之流涕巢傾卵覆分無此生雷動風行忽有今日矧屢下夫恩旨且備聞于訓詞察蒙惡之未昭稍還舊秩憐隆緒之將絕更錄諸孤勢已解于倒懸理實均于再造此蓋皇帝陛下道極溥博德隆寬仁聽不惑于忠邪惠無間于存歿聖恩加痛死者不可復生

孤臣孑然泣盡繼之以血未有糜捐之路莫酬覆幬之仁

謝職名表

至恩優異事出非常小已空疎心知弗稱莫敢辭避徒切兢凌伏念臣族緒寢微器能素薄偶蒙收錄遂致使令頃自西州擢居東部指授綱領皆面奉于德音環走道塗以身行于使事豈敢妄論繩墨之外庶幾自竭斗筲之餘比上奏于計書忽下頒于詔旨寵踰華袞已驚

天語之褒榮極登瀛更冒儒林之選喜心生于望外愧
汗溢于顏間此蓋皇帝陛下道貫兩儀德參七廟作新
王度治舉三代之隆訓飭臣工明照千里之外有如微
賤亦賜獎成謹奉詔條敢不深體朝廷之美意稍溫學
問亦以勉副君父之誤知圖報之誠死而後已

謝加恩表

宣室受釐璽書行賞均被配天之澤不遺小國之臣臣
聞奠玉實柴極聖人之能事加地進律示人臣之至恩

慶熙事之告成率庶工而大賚莫陪顯相之列預享褒
嘉之榮渙汗既周循墻莫避恭惟皇帝陛下懋昭一德
有宥萬方靡專饗于神禧使並膺于帝祉恩如乾造知
覆幬之難酬命輕鴻毛誓捐糜而自竭

謝昭雪表

投畀讒人已悟告言之妄蠲除詔令更申論坐之冤沒
而有知死且不朽竊以前世論事下敢告之章法家原
情著反坐之律未有私書謬悠之謗可致公朝夷滅之

刑繫彼無良構為不令因黨友之尺牘形閭巷之度辭
引鷹揚尚父之言誦高貴鄉公之語靡慚嗤鄙惟幸詆
誣既內歎于不根又陰虞于後患禱其付火固絕意于
上聞託以屏人復何施于參驗不攻自破欲蓋而彰巧
誰謂其如簧市共知于無虎雖毀者挾怨必以惡聲而
小人乘危遂為竒厄密騰舊札歷遺衆仇險不啻於山
川食無餘于犬彘逮從吏訊幾誤國章意所株連人以
股栗浩有漂山之勢岌如累卵之危賴先帝照矚之明

察權臣吞噬之患特迂清問少緩嚴科然而先臣諸孤
終以屏廢闔門百口益復幽囚禦瘴癘者十喪隸臣妾
者三歲無罪且至于如此大戮亦何以復加會上聖之
龍飛破羣疑而冰釋譴累所逮訴告必申悼前日之禍
機嗟何可及掛有司之罪籍名或未除用再瀝于肺肝
敢上塵于旒宸理無難者宜靡悼于改為事已灼然遂
悉從于釐正此蓋皇帝陛下乾行以健離麗而明體大
舜聖讒之方廣有唐辨謗之略孤忠素節事已白于九

原弱子幼孫誓各堅于一死微生何算洪造難酬

露布

擬嶺南道行營擒劉銀露布

嶺南道行營都部署潘美副部署尹崇珂都監朱憲等
上尚書兵部臣等聞飛霜激電上帝所以宣威罰罪弔
民明王以之耀武我國家仰稽玄象大啓洪基將復三
代之土疆永泰萬方之生聚西平巴蜀雲雷敷潤物之
恩南定衡湘江漢鼓朝宗之浪惟嶺南之獷俗獨恃遠

以偷安久背照臨罔遵聲教偽漢國主劉鋹性惟凶惡
識本庸愚以虐害為化風以誅戮為政事制火牀鐵刷
之獄人不聊生設剉碓湯鑊之刑古未嘗有恨刀鋒之
不快用鋸解以恣情鬻割剖屠窮彼殘害一境顛天而
無路生民何地以稱冤衆心俟后如望雲霓我皇帝仁
深恤隱義切救焚遂發干戈拯其塗炭臣等上憑神武
遙稟睿謀舉軍未及于半年乘勝連平于數郡累逢戰
陣無不掃除劉鋹遠懼傾危尋差人使初則稱臣上表

其陳歸化之心後乃設詐藏姦翻作款兵之計臣與將士等仰承睿旨不敢逗遛于正月二十七日已到柵口去廣州只及一程劉錕又頻發佐僚來徃商議漸無憑準固欲淹留兼于諸處收到新出偽命文榜皆是會合逆黨以拒王師至二月四日果遣其弟偽禎王保興等部領舉國軍兵併來決戰臣等憤其翻覆認此狂迷尋結戰以交鋒復揮戈而誓衆行營將士等感大君之撫御咸願竭忠怒逆黨之拒張爭先効命八十里鎗旗競

進數萬人殺戮無遺尋又分布師徒徑收賊壘其劉鋹
知城隍之必陷將府庫以自焚烈焰連天更甚昆岡之
火投戈散地甘從涿野之誅劉鋹則尋即生擒廣州則
當時平定其在州官吏僧道軍人百姓等乍除苛虐咸
遂生全無不感帝力以沾襟望皇都而稽首此蓋天威
遠被宸算遐敷平七十年不道之邦救百萬戶倒懸之
命殊方既入長承日月之迴光鴻祚無疆永荷乾坤之
降祐其劉鋹并偽署判六軍十二衛禎王劉保興太師

潘崇徹等并舉國軍兵及太史內太師龔澄樞列聖宮使六親觀軍容使內太師李托內門使驃騎大將軍內侍中薛崇譽等朋助劉張旅拒王師既就生擒合同俘獻臣等幸陪戎事倍樂聖功無任快抃歡呼之至謹奉露布以聞

擬昇州行營擒李煜露布

昇州行營馬步軍戰棹都部署宣徽南院使義成軍節度使臣曹彬等上尚書兵部臣等聞天道之生成庶類

不無雷電之威聖君之統制萬邦必有干戈之役所以
表陰慘陽舒之義彰弔民伐罪之功我國家啓萬世之
基應千年之運四海盡歸于臨照八紘皆入于提封西
定巴邛復五千里昇平之地南收嶺表除七十年僭偽
之邦巍巍而帝道彌光赫赫而皇威遠被頃者因緣喪
亂分裂土疆累朝皆遇于暗君莫能開拓中夏今逢于
英主無不掃除惟彼江南言修臣禮外示恭勤之貌內
懷姦詐之謀况李煜本是駭童固無遠略負君親之鞠

育信左右之姦邪曾無量力之心但貯欺天之意修葺城壘欲為固守之謀招納叛亡潛萌抗拒之計我皇帝度深含垢志在包荒輟青瑣之近臣降紫泥之丹詔曲示推恩之道俾修入覲之儀期暫詣于闕庭庶盡銷于疑間示信特開于生路執迷自履于危途托疾不朝豎心背順士庶咸懷于憤激君親曲為于優容但矜孽豎之愚蒙慮陷人民于塗炭累宣明旨庶俾自新略無悛悟之心轉恣陸梁之性事不獲已至于用兵大江特創

于長橋銳旅尋圍其逆壘皇帝陛下尚垂恩宥終欲保全遣親弟從鎰歸迴降天書委曲撫喻務從庇護無所闕焉終懷蛇豕之心不體乾坤之造送蠟書則勾連逆寇肆兇徒則刦掠王民勞我大軍駐踰周歲即人神之共怒復飛走以無門貌貅竟効其先登蟻虱自悲于相弔臣等于十一月二十七日齊驅戰士直取孤城姦臣無漏于網中李煜生擒于麾下千里之氛霾頓息萬家之生聚尋安其在城官吏僧道軍人百姓等久在偏方

困于虐政喜逢盪定皆遂舒蘇望天朝而無不涕洟樂
皇化而惟皆鼓舞有以見穹旻助順海嶽知歸當聖明
臨御之期是文軌混同之日卷甲而兵鋒永戢垂衣而
帝祚無窮臣等俱乏將材謬司戎律遙稟一人之睿略
幸成九伐之微勞其江南國主李煜并偽署臣僚以下
若干人既就生擒合將獻捷臣等無任歌時樂聖慶快
歡呼之至謹奉露布以聞

策問

經學

問六藝之學亡于秦存于漢然自漢以來諸儒異論當時無以折衷故兼收而並用之施孟梁丘易歐陽大小夏侯尚書公穀春秋皆立學官劉歆有言與其過而廢之寧過而立之綜所以久六藝之傳者諸家之助為多國家廣學校訓經義易詩書三禮皆列博士此甚盛德至于春秋則尚謙遜未遑也意者其有待耶且左氏公穀之書自漢至于今並行未能偏廢將採劉歆之論皆

立學官則疑非所以一道德將攷三家之言而去取焉
則質之聖人孰為得失不然雖陸質啖助孫復石介之
徒苟有得于聖人之意無不可立者此皆學者所宜言
上之所宜聽諸君其著之勿忽

武功

問昔馮奉世有功外國蕭望之以為雖有功效不可為
後世法奉世卒不得侯郝靈佺奉使傳默歿首至京師
而宋璟恐後之干寵者為國生事踰年纔授郎將此兩

公長慮顧後謀國深切然徃時義陽擊斬樓蘭定遠通
道西域錄功受封流澤後世施設之致殊科而詳味其
旨良各有以夫主上乘先皇帝討擊之威元年夏人犯
塞不戰而遁二年縛青宜結西羌震驚此亦乘釁投隙
不可失之機會脫有志略之士憂國發憤見幾而作一
建非常之功則議官文吏得無捨蕭宋之餘以扼之耶
幸折衷其是非試豫為之處焉

治法

問周之盛時法謹于上人循法于下有善莫之蔽亦不能蔽不善不能容亦莫之容信誕實偽不可掩如此故五州相賓所賓必進五家相保所弗保必廢當是時在上者無為也取舍寄之衆心而已傳曰鄉與朝爭治蓋謂是矣國家一德同俗為日已久宜若靡然向風比隆三代之盛今也猶患其不然人無常心士無正智昔所是者今以為非此所貴者彼以為賤私義偏聽詭情匿智上莫得而察也使天下之人為善不得進為惡不患

廢如是者非特草野之民學士大夫預有焉其故何哉
夫豈教之不至歟將賞罰未明好惡不一也今將鼓厲
風俗使好惡不殊情實無隱取舍同于上有同于成周
之時諸君以為何施而臻此由堯舜而下訖于周道德
明法度正著于書具在也自秦而下訖于五代則得失
成敗之致為多故矣其迹亦有史存焉學者據經論世
自秦而下或略弗道抑嘗攷之高光創業繼統文景風
俗醇厚武宣制作中興顯肅嚮用藝文語兩漢者于茲

為盛矣蜀與魏抗衡累世二晉雖遷享國尚久中原江
左建立相望唐有天下興于貞觀盛于開元肅憲文武
皆號治世彼其所志所為所造所就雖不一道然施為
之方其必有得傳不云乎亂國之法有可隨者況歷世
之盛而可略哉朝廷稽攷古事施之有政厥如弗及諸
君其按舊史著之篇以待採擇焉

勸農

問先王井牧其田野以任民什伍其人民以治野制為

法令使參相得然後建官設屬為之帥屬當此之時田疇則闢溝洫則治倉廩則實雖有水旱人無菜色傳所謂積于不涸之倉于此有焉國家疆理海內靡田不墾穀粟之獲不可為量數又有常平義倉以逮貧阮公私之給宜若裕如而歲一不登人有飢色至或陷于死亡何其食之不贍也夫利原于天物布于地古之天下亦今之有也而多寡贏不足如此無乃民之從事于末以害農者蕃為酒醪以靡穀者多六畜之食焉者夥歟不

然治野之法攷于古或未中歟古人有言行其田野計其農事而飢飽之國可知也諸君以所見于今攷所聞于古遠思利害所在庶將與執事者共之

通商

問古者斲木為耜揉木為耒耒耨之利以教天下而食足日中為市致天下之民聚天下之貨交易而退各得其所而貨通食足貨通而天下無事夫錢刀之利布帛之用金錫木材魚鹽果蓏器服織嗇之物彼編戶齊民

闕一不具有不可以終日而況上之人哉故先王制商賈之職使之通功易事因利轉徙非有調發期會而遠近之貨交足此亦天下之至術也及至後世上好而下有甚無用之器難得之貨紛紛爭出于是游手益衆本業益壞諺曰農不如工工不如商蓋農之人一而工商之人百自漢以來議者發憤為言未之有改國家承平歲久生齒充盛游手末利之人視前世不能加少然而貨賄之積猶有所未通此其故何也夫二邊為國捍蔽

常患穀貴而食不給三江五湖衣食之原然錢幣不足而有貿易之患吳楚之材木不勝用而殺函之人穴居渤海之魚鹽不勝取而鄒魯之人藿食至于器械百工之物不相為用者難以毛舉然則無乃不足于貨乎夫商賈繁而貨賄盛此理勢宜然也今交利者衆而貨利不通是必有說焉有司方究利害之所在以救斯弊諸君不可以不告也

兵法

問漢使韓安國王恢議匈奴安國欲勿擊恢以為擊之
便卒有馬邑之事漢不足法也然兩人持論議往返斷
斷焉有足觀者諸君試為漢計宜如何而可因擇其言
亦有可為今日用者子傳曰地利不如人和此至計也
然趙奢先據北山秦不得逞武侯出斜谷宣王屯渭南
惟視中原之得失以為成敗由此言之爭地之利其亦
不可以已耶抑秦趙之所取舍與魏蜀之強弱自有辨
也古人有言不至學古兵法不以法亦可以濟乎吾子

攷古人之已行與吾子之所蘊并著于篇待上之求焉
傳言技擊不可以遇武卒武卒不可以遇銳士銳士不
可以當節制節制不可以敵仁義夫節制之不可當仁
義之不可敵其理甚明至于技擊武卒銳士之優劣如

何

案此下有闕文

攷工

問工天下之末作也不備末則本不立不制其末則本
安得而立乎故先王之法工之在官者六分其官而工

居一工之在民者四分其民而工居一多寡之數以是為稱猶患其赴之者衆則為術以權之不飭宮室不靡異服竒技淫巧以疑衆者殺無赦當此之時持規矩繩墨以事上與游手末利之人法度之外無敢為也今承平歲久生齒充盛繡組雕鏤賈生董子之所不能道者尚多有之而戒禁之令漢唐之所能行者或未舉也如是而欲事簡財省風俗樸厚以成德化之盛顧不悖哉今將攷古之所可行擇今之所宜禁諸君子以為安所

適從也

啓

監司賀冬啓

伏以土炭平衡氣適推于火勝地雷觀象時方慶于陽
生恭惟某官性質敦閑才猷高妙膺此澄清之寄隱然
聞望之隆宜上天之降康協大雅之求福某坐縻吏狀
阻造賓墀祝頌之誠倍百常品

賀保馬啓

伏審祇奉恩綸榮更使節獲依仁庇深切歡誠某官風
力敏彊性資溫厚道洽士論政為吏師隱然聞譽之隆
膺此澄清之寄方朝廷更新于馬令俾郡縣講究于詔
書非有通明之才孰當臨按之選果膺褒擢實快觀瞻
眷春律之將窮仰使臺之尚遠茂惟德履日擁休祥益
冀保頤下副頌願

到任謝執政啓

比叨詔檄誤賜守符驅馬過家懷章入部以材資之素

薄當事任之非輕惟感與憂以夜繼日伏念某降才不
腆賦命多艱間被選掄祗速罪戾免官歸郡滿歲奉朝
豈謂上聖推含垢之仁諸公篤念舊之義輔郡甚劇實
難備員官資尚輕俾為假守況事功交作之際當殘廢
未完之時大非顓愚所克稱副某官為國造士因能任
人兼聽百官之成不遺一介之賤非徒假以光寵亦將
責其勤勞儒者舒緩養名願以為戒古人造次集事敢
不自強庶酬已知少避官謗

代任舅謝執政啓

准告以宗誼前通判沂州日監督捕獲賊人張開等蒙
恩特授某官者小盜逋誅方積淹時之懼洪恩疏寵忽
叨增秩之榮伏念某奮自艱危困于冗散習知田里之
事久服簿書之勤法令為師人何容于私意夙夜匪懈
事不見其難成拊心自信于平生投老但甘于常調憶
昨竊攘嘯聚村落驚騷坐慙銷弭之功往持督捕之令
吏兵致命魁黨就擒職分固所當然賞典獨安取此茲

蓋伏遇某官甄治萬類銓衡百僚庶事康于股肱太平
期于旦暮迪上以先王之典欲好善之獨優納人于君
子之塗故疑功而惟重是令窮陋有此超踰重念某名
弗掛于黨人年未加于耳順素非狂瞽胡肯退藏徒以
叢衆責于一身未能供卒歲于千指冀沾真館之俸且
便汶田之耕然而力未逮心得不償失痛強仕之不再
感盛時之難逢儻垂拔拭之仁尚有激昂之氣申于知

已聊以陳情

昭雪先公謝執政啓

上聖端臨羣賢拱輔萬事罔有勿理百姓自以不冤洪
惟累朝欽慎庶獄匹夫輒讞尚戒毫釐之差大臣見誣
可容白黑之眩憶昨禍起不測謗加已亡陷燕桑之謀
聖主覺其書詐抱田貫之義志士或以死明備見不根
之情猶施及嗣之罰窮海萬里兩樞弗歸毒癘三年一
門垂盡肆龍飛而虎變聿覓見而雪消藐是諸孤首蒙
拯拔實雖甚厚名則未然且將而必誅豈容降等之坐

而否則無罪安用會赦之文載援疑辭上求決語初屏
錯于羣枉又刊落于舊章詔音一傳士氣如洗此蓋某
官房杜在位丙魏有聲直道以盡大臣之能虛已以應
天下之務推引人物不間戚疎馴致上恩以及存歿重
惟先正早預常僚晚歲離騷魂竟招于異域平生精爽
夢猶託于故人幸山公之在朝痛介侯之無祿霜露所
感日月有期然而貶降之秩未還弔恤之恩尚闕扶杖
以聽終觀詔令之行造膝而陳更賴弼諧之助言盡于

此涕不自收

到任與鄰郡啓

比叨詔旨來領郡章學術闊疎彌切官箴之畏聲光密
邇敢忘鄰寶之依某官政術吏師材資國器方均勞于
外府行輔治于中朝竊仰素風實勞鄙素

書

上文潞公書

月日具官某獻書太師潞公執事天下之達尊三其備

福五凡有一于此足以高世而執事體全德履盛位處
乎聖人之時勲勞福祿崇顯光大自朝廷之所倚重士
民之所歸仰武夫孺子山陬海澨聞執事之風頓首斂
衽而某不韙欲以言語文字形容其風肆言之則詞費
約言之則意奪決非稱謂譬喻之所能及因不敢不叙
其所以來而自致其意某不佞無他技能惟讀書論世
攷已然之事以識其非常之人以是為見也言論風旨
又無所傳也三十餘年矣則以其所以稱者識之相望

乎寥寥而心跡之妙如自其眉宇中得之其下遺書野史靡所不究必識其人而後慊其于前世之士如此而況處今之世以學為官竄名士大夫而目不識執事獨與武夫孺子山陬海澨之徒嚮風而斂衽焉豈其本心哉方士大夫羣趨堵進忽前乍卻爭毫末于執事之門而獨抱區區之本心逡巡不進亦非苟以為異誠各有趣也今執事以王勲國功歸之朝廷以完名全節付之當世而獨收其不貲之身以去前日之羣趨堵進忽前

乍卻爭毫末于門者殆將望執事之僕御而不可得某
于此之時而識執事承其顏聽其聲悠然問貺然辭以
比夫遺書野史期古人寥寥之中竊自以為有得焉遂
忘其愚伏惟加憐而進退之幸甚不宣

代陳伯通見許少張書

某聞之也有以制天下之動而不勞有以羣天下之散
而不亂者法是也法之精出于道德性命之微而其粗
入于政刑號令之末惟其出于至精則非聖人有所不

盡及其入于至粗則匹夫匹婦可以與知是故創法以
詔後世者聖人也因時改作者賢人也以死守之者有
司也不敢私議者衆庶也士之生于世幼而讀天下之
書長而論天下之事者備矣然而無異于不敢私議之
衆庶者何也不得其位則不預其事故也是故天下之
士患無其才也有其才矣患無其位也有其位矣然而
又無以異于以死守法之有司者何也不得于上故也
故士之退而不得其位則不敢私議而不足進而得于

上則因時改作而有餘此世之君子所以守道俟命以
得其位為難也以得其位為難而又況得于其上者乎
恭惟執事道業之純備學術之精明士大夫所以歸嚮
屬望者固已厚矣側聞朝廷重念荆湖遠方政治未盡
其理再以察訪之權委執事執事可謂內有其才外有
其位者矣道業學術足以自結于主上而至誠密勿人
之所不聞則所以得于上者又可知矣士大夫平昔之
所以歸嚮屬望者莫不引領以觀所為某實荆湖人預

聞盛際固已欣快而又里閭之相近耳目之相接有不能忘心者多矣然不肖之身孤窮僻陋甘自齒于衆庶亦已久矣今者幸當無所不用言之聖時而復遇執事求欲用言之際拳拳之心願進見于門下苟賜頃刻之間而垂問焉則匹夫匹婦之愚或有冀于賢人君子之擇也臨紙不勝區區

代進士洗翱求見郡守書

某聞之豫章之木其長九仞瞰壑而視肩于尺莖陽朔

之石其廣百圍踰嶺而望方之累卵此無他勢卑者隱其長勢遠者蔽其大也士生而貧且賤越在下國身與鄒魯諸儒齊楚辯士燕趙奇節之人風馬牛不相及也貿貿張張耳目坐廢不聞措紳先生警欬之音其勢何特畎壑之卑踰嶺之遠雖其瑰意琦行陵厲秀發久將日銷月奠終就鄙吝而已又況才質本薄濟以僻陋非有九仞百圍之實而欲以高且大望于世之人亦何可得乎以是當食輟餐中夜忘寐歷觀古人相與之際彼

皆目擊道存一笑莫逆悟合之妙非言非默若有法度存乎其間某不佞竊嘗有志于此又讀莊生郢人匠石之事知夫忘言之辨在人者易工而不動之質在我者難持思遇當時所謂賢士大夫一試其意而得也恭惟某官名卿之後以學為官事業顯著聞聽有年所以出分符守實來此邦而某以邑子諸生贅言進見以言其文則羣趨堵進忽前乍卻何道之有以言其情則無非是者凡某官一語一默邦人視效者某實有得焉而某

之于閣下必待語云而語默云則默則亦豈某之所試者哉閣下有忘言妙斷之功則某也亦將無卑遠隱蔽之患古之人所以貴賤賢不肖常相為用而身名俱榮未有不出于此某之受賜不已多乎區區惟閣下諒之

答孫彥文秀才書

某頓首彥文閣下伏承臨訪惠書辭意鄭重出于好問因見期以先生長者之事非所敢知也朝廷廣庠序隆師儒道化之流際天接地士之生斯時患不為而已苟

加之意不出閭里而師友之益絃誦之樂舉在于此所
問而通所學而得所欲而至故事半古之人而功倍之
莫便于斯時况以材質之良加夙夜之勤譬如巨魚縱
大壑右洞庭左彭蠡洪濶巨浸惟意所適其所乏者非
水也而顧視潢汙行潦之潤猶欲一涉焉則亦過矣夫
經術論說之微旨古今治忽之已事諸子百家之餘意
彥文探討之至復熟也然而辭章之變隨世損益故前
人謂英華出于情性賈生俊發則文潔而體清子政簡

易則趣昭而事博子雲沈寂則志隱而味深平子淹通則慮周而藻密其論大率如此彼數子者非出于三代陶冶成就之力也而原其情性之美則卓然足以高世況庠序淵源有若今日而篤學好問又如彥文者則三代之文體制具在彼數子亦何足以睥睨乎比聞有司患程文汎濫思得雅正之詞以勵學者彥文資粹秀發為詞章以副有司之求在加之意而已

答趙子文書

承子文不復調官日與家妹齋素參禪虎兒已令披剃
子文又多入諸山尋訪尊宿篤好如此衆所讚歎某學
無所得言不足採顧諳歷稍多又骨肉之故不能忘言
子文上有親慈下有妻子諸緣未散要當隨順家世門
戶要當主管今留情如此諸事得無偏廢一也古人學
道以彈琴設喻謂緩則無聲急則斷絕要令身心調適
乃可證入今改易平常暴自刻厲大節急矣日長月遠
何以引久二也學道在心不在形迹今罷官改業夫妻

粗糲小兒無知亦使披剃此但出家門庭餘事正使全家削髮山林遁迹苟心地未安終必無益若心念相應在家修行亦自有優婆夷經三也入道無門無處非門古人問答言語才是一節故曰十二時中許爾一時外學何謂外學謂學佛法然則十一時中其意可見今求師問話決擇因緣外學進矣遂以為道盡在此無乃不可四也古人學道途轍不一而無意為主子文今日之事乃因長子喪亡悲惱自失有激而然似非無意他日

年祀寢遠悲心更微刻苦之力稍倦則退速之效可跬而俟五也事難毛舉聊陳五說若果能以無意為主以退步為進除去執著身心如一誠如是雖不學諸方何以尚此所謂家世門戶父母眷屬妻子皆是佛法中事何常妨闕區區竊為子文安此或曰聞勸人精進不聞勸人怠惰某曰古人不云乎為破戒人說持戒法為持戒人說破戒法故美食非不養氣過飽則患生毒藥非不害性當用則病除顧用之如何耳尚須款見面道

與張侍郎書

某頓首芸叟宮使侍郎某屏跡田廬人事廢缺累年書不至門下亦久不奉賜教晁詠之朝奉來能言動止以慰馳情知今春尊候少違和尋以康復又知令子繁惱高年常情所不易堪忍惟達觀遠照當自有度此非鄙淺所敢擬議也德望惟舊悠然退處而士之傾仰愈深尚厚自愛為斯文重某有哀懇非門下無當告者昔先人行己本末信于士君子固以晚歲遷謫亦與諸公同

過身後誣謗又蒙聖朝核實已賜昭洗則事皆無可言者獨私自念舉葬已久壙中隧首皆無碑誌生平事蹟無所載日復一日尚幸先人交友有數公者在雖未嘗相親接見勞苦而諸孤實歸賴之如長途炎暘遙見美蔭差彊人意今諸數公者稍稍淪謝存者益寡更復隔閡欲一望見之且不可得況欲熟其話言則先人遺美遂將泯沒無所質問一念及此心死形廢忽不知夜之既旦某行年六十一衰殘多疾如是就死終不瞑目以

是歸誠門下日夜念之至復熟也意者碑誌雖不可作
先人有文集三十六卷儻不惜數刻之暇一為序引使
先人平生大畧得以概見不識聞此亦憫然有意否乎
伏惟哀憐聽許身當伏屏思口陳至誠而東西遼阻輒
以尺書干冒舉措不中節亦惟有以諒之文集不敢寄
遠謹錄其目上呈鄉人曹欽若文林聞其請見甚數因
其歸任良便敢附此書如蒙賜報即卜日別走家僮往
詣聽命臨紙不勝拳拳

代人求薦書

某聞士生而貧且賤君子不以為窮惟愚不能自立不見收于賢人之門君子以為窮也古之士衣不兼食不屬曾不以為憂則以有世之賢者為之歸賢者推誠汲汲如恐不及亦以世之窮人惟我是賴當今之時寬厚得士操可為之勢若執事者乃下之所難遇而厄窮困躓愚不自立若某者亦上之所罕見伏惟赦其狂使畢其說伏念某結髮而仕奔走郡邑之吏三年于茲矣兢

兢業業竭智盡慮不敢有毫髮之過然亦未嘗有涓埃之功公卿大夫憐而薦之者亦有之而終未足以應銓選之格以是年愈老而身益困若此者不謂之窮可乎
今天幸乃在執事之部吏吏無賢不肖爭出迭進以不得于執事為恥其病窮久矣而不思所以自達則愚何時而瘳予可否之際惟執事少加憐焉不宣

學易集卷五